



في بوستات كثير إنتشرت الفترة الأخيرة على موقع التواصل الاجتماعي (فيسبوك)، و سبحان الله يا مؤمن المقدمة واحدة..

(أي حد بيشكك في تناسخ الأرواح ابعت له البوست ده)

ويبدأ بسرد قصة من قصص تناسخ الأرواح المشهورة، والتي عجز العلم عن تفسيرها.

عشان كده حبيت أبحث عن الموضوع وأصله،

وبفضل الله تعالى وحده كتبت سلسلة بوستات أتكلت فيها عن نشأة فكرة التناسخ، والأدلة عليها، وأشهر العلماء اللي بحثوا فيها وحاولوا إثباتها.

كمان أتكلت عن الأدلة اللي بتتكر التناسخ، ورأي الدين فيها، وأخيرا المستفيدين من فكرة تناسخ الأرواح.

والحمد لله رب العالمين، التفاعل كان جيد جدا، وناس كثير مدحت الأسلوب وطريقة العرض، وفي ناس أقترحت جمع البوستات في كتاب زي ما عملنا في (سلسلة أسرار الجان).

وعشان كده توكلت على الله عزَّ وجلَّ، وعملت الكتاب ده..

ويا رب يعجبكم 😊

د. أحمد عبدالسلام.

(تنبيه: اللينكات الخاصة بالفديوهات في الكتاب بمجرد الضغط عليها هاتنقلك للفديو مباشرة، وكمان لو ضغطت على اسمي اللي فوق ده 🙌 هتوصل لصفحتي الشخصية، بس أوعى تتوه 😊)

أنا مش أنا!

تناسخ الأرواح

أنا جاي النهاردة أعترفلوكم بسر خطير، أنا مش عارفني، أنا مش أنا 😞

لا..لا.. مش جاي أغنيلكم، أنا عاوز أقولكم إني أكتشفت أني قبل ما أكون أحمد عبدالسلام، كنت عايش في مكان تاني، كانت أرض كبيرة مزروعة نخل وشجر، وكان عندي بيت كبير وخدم وعبيد، كان أسمي ساعتها (با يام) وكمان زوجتي كنت بنادي عليها باسم (ماليسا) .

شكلك مش مصدقني! ، طب إيه رأيكم كان عندي بنتين الكبيرة (أهارة)، والصغيرة (نونيا).

وكمان أنا مت لما هجم مجموعة لصوص على موكب الصيد بتاعي أصل أنا كنت بحب أصطاد الغزلان.

أوعوا تكونوا لسه مش مصدقين؟!

أمال لو قلتلكم، إن بعد كده كنت أحد القصاصين المشهورين في العصر العباسي؟!

اسمي وقتها كان (عثمان الباجوري)، بس للأسف مت
برضه لما هجم لصوص على قافلة كنت فيها وأنا
مسافر لليمن، بس ماكنتش أتزوجت وقتها.

وأكبر دليل على كلامي، إني بعرف أكتب قصص،
وعندي دلوقتي بنتين برضه!

طب أقولكم من الآخر..

إن شاء الله هنبدأ نسرد تجميع لسلسلة بوستات بتتكلم
عن (تناسخ الأرواح)، ونشوف يعني إيه تناسخ
الأرواح؟!!

وفي فرق بينها وبين تقمص الأرواح؟!!

الحالات المشهورة عن تناسخ الأرواح العلم قدر
يفسرها، ولا وقف بيضرب كف على كف؟!!

طب الديانات إتكلمت عن تناسخ الأرواح فعلا؟!!

وكم ان فعلا في نصوص دينية بتأييد الكلام ده؟!!!

كل ده هنشوفوه مع بعض إن شاء الله..

يلا بينا.. 😊

#أنا_مش_أنا

#البوست_الأول

#تناسخ_الأرواح

طبعاً موضوع تناسخ الأرواح مشهور ومعروف، وفي قصص وشواهد كتير عليه، ويمكن نقول مجاز إن ماحدش عرف يفسر الموضوع ده.

وقبل ما نبدأ خلينا نضع النقط على الحروف زي ما قلت في البث الصوتي الموجود على صفحتي.

في ناس هتطلع تقولي ده حرام ومخالف للدين ومش معقول يحدث، وناس هتقول ده واقع وفي أدلة كتير عليه، وفي ناس بتقول يا عمي أهو قصص وبنسلي نفسنا..

عشان كده حبيت أقول لحضراتكم بعض النقاط في الأول:

١-البوستات دي هترد على كل الأراء، وهحاول نشرح كل حاجة زي ما عملنا في #أسرار_مملكة_الجان. وبإذن الله هأحاول أكون متجرد من كل الأهواء والإعتقادات الشخصية اللي ممكن تأثر في البحث عن أي موضوع جدالي.

٢- لو حضرتك مش حابب تقرأ الكلام ده، ومش شغلك الموضوع من أساسه فأتمنى إن حضرتك تتابع في صمت وتقومني في أي خطأ أقع فيه، وهأكون شاكر جدا لحضرتك، لكن بلاش السب والشتيمة والتعليقات المهينة اللي أتعملت في السلسلة اللي فاتت.

٣- البوستات دي أنا مش مألّفها من دماغي أنا هأجمعها من كذا مصدر وأكتب أغلبها إن شاء الله بأسلوبى، عشان ماحدش يفتكر إنى عريف زمانى، ولا يمكن أكون كنت عريف زمانى في العصور الوسطى وأنا مش فاكّر 😊

٤- أخيراً، برحب بأي إستفسار أو سؤال أو إقتراح، أو حتى نقد وهجوم سواء في كومننت أو على الخاص في أي وقت لكن بحدود الأدب والإحترام.

٥- معلى طولت عليكم.

٦ - ولغاية عشرة ما فيش حاجة بس مزاجي أكتبهم وخلص 😊

.....

تناسخ الأرواح

عشان نبقى فاهمين في فرق بين تناسخ الأرواح،
والتجسد (أو التقمص) ..

تناسخ الأرواح مصطلح معناه:

هو رجوع الروح بعد الموت من جسد لجسد آخر،
يعني لمؤاخذه كده ممكن واحد مثلا كان ملك أو عمدة
قرية ولما مات روحه سكنت في جسم (عجل
الجاموس) اللي أتولد تاني يوم وفاته، ولما مات
(العجل)، الروح سكنت في الشجرة اللي نبتت تحت
بيت جيران صاحب العجل!

أما التجسد أو (التقمص) فده معناه:

إنتقال الروح من إنسان لإنسان فقط بعد الموت، يعني
عمدة البلد روحه سكنت في ابن أخته اللي أتولد في
نفس شهر الوفاة.

وعشان كده كل القصص والروايات والأبحاث أتكلمت
عن التجسد لأن طبعا سهل تتكلم مع إنسان زيك، مش
مع حيوان ولا نبات وإن كان في ناس مذهبها ضرب
خالص زي (ابن عربي) كده، لكن ده مش وقته.

فأحنا هنستخدم في كلامنا مصطلح (تناسخ الأرواح)
لأنه مشهور، بس نبقى فهمين الحكاية أصلها إيه.

أصل التناسخ جاء منين؟

طبعاً فكرة الحياة الأخرى، والعودة بعد الموت كانت مترسخة في أذهان الحضارات القديمة زي الفرعونية وغيرها، وكمان ملاحظة إن الروح شبه بتخرج (بشكل ما) أثناء النوم، وبترجع تاني للجسد.

فكرة رجوع الروح بأجساد أرضية ناس بتزعم أنها متأصلة في بعض الأديان القديمة مثل بعض مراحل تاريخ مصر القديمة واليونانية والهندوسية والبوذية.

لكن بداية إشتهار الفكرة كانت على يدي:

ألان كارديك: وده كاتب فرنسي أنشأ حاجة اسمها العقيدة الروحانية، وكان بيتكلم عن علاقة الروحانيات بالحياة المادية.

والثيوصوفية : ودي جمعية أو طائفة أتأسست على يد (هيلينا بلافاتسكي) ومعنى الثيوصوفية الحكمة الإلهية، وكانت بتزعم إن الثيوصوفية موجودة منذ فجر التاريخ وأحد أهدافها إنشاء أخوة عالمية واحدة (كلنا أخوة مع بعضينا وكده يعني)

طولت عليكم معلش،،،

بس زي ما قلتكم الموضوع ثقيل وعاوز تركيز شوية.

#البوست الثاني

تناسخ الأرواح حول العالم

متابعينا الكرام، حصريا صدق أو لا تصدق،، والآن
مع فقرة حكايات حول العالم!

البوست ده يعتبر فرفشة قبل ما نغوص في التقليل..

وهنحكي هنا عن بعض القصص مش كلها، واللي
حدثت لأشخاص زعموا إنهم عاشوا حياة ثانية قبل
دي:

١- بيقولك يا سيدي:

كانت "باربورا كارلن" *Barbro Karlen* في زيارة
إلى أمستردام، وعمرها عشر سنوات، فأرشدت والديها
إلى منزل "آن فرانك"، رغم أنها بتزور عاصمة
هولندا للمرة الأولى!!

تعرفت *باربورا* إلى غرفة "آن فرانك" بتفاصيلها،
وقالت إنه كانت هناك صور لفنانين ومشاهير معلقة
على الحائط. والمرشد السياحي في منزل *فرانك*، أكد
وجود صور، لكن القيمين على المتحف أزالوها للحفاظ
عليها.

وكانت **باربورا** منذ صغرها تدعي أنها "**آن فرانك**" (1929-1945). وهي فتاة ألمانية يهودية، تُوفيت في عمر 16 عاماً تقريباً في محرقة "**أوشويتز**"، واستطاع والدها أن ينجو ويعود إلى مكان سكنهم في أمستردام، فوجد مذكراتها ونشرها في كتاب تحت عنوان: "مذكرات فتاة صغيرة" The Diary of a Young Girl.

باربورا دي بقى أتولدت في السويد من والدين مسيحيين. وفي السنة الثالثة من عمرها، بدأت تقول إنها ليست **باربورا** بل "**آن فرانك**". واستمرت بسرد أحداث من حياتها السابقة.

في عمر السبع سنوات تعرفت باربورا للمرة الأولى إلى آن فرانك، لكن ليس من خلال ذاكرتها، بل من خلال أستاذتها في المدرسة، لتدرك لاحقاً أن فرانك اللي كانت بتتكلم عنها شخصية معروفة!

٢- وبيقولك كمان:

في عام 1957، خرجت الشقيقتان **جوانا** البالغة من العمر 11 عاماً و**جاكلين** التي تبلغ 6 أعوام، إلى الممر المؤدي من منزلهما في مدينة ويتلي باي شمال إنجلترا إلى الطريق العام للذهاب إلى الكنيسة من أجل حضور قداس الأحد.

إلا أن لم يستطيعا الوصول فأتثناء قطعهما الطريق اندفعت نحوهما سيارة بسرعة ولقيا مصرعهما.

وبعد مرور عام ونصف على هذه الحادثة التي كانت صدمة قوية على الأب "**جون بولوك**" بائع اللبن، و**فلورنس** زوجته، بعد فترة رزقا الزوجين بتوأم آخر "**جيليان وجينفر**"، وحرص الوالدين منذ مولدهما على التوقف عن ذكر أي تفاصيل الواقعة السابقة أو عن حياة الطفلتين الراحلتين، إلا أن الأمر الغريب هو أن التوأمتان هن من تذكرتا التفاصيل الدقيقة عن حياة شقيقاتهن بأنفسهن دون معرفة شيئا من أي شخص.

وفي إحدى المرات سألت **جينيفر** والدتها، ماذا عن السيد ... ؟ ، هل مازال يتعذب جراء ما فعله بسيارته؟ ، وذكرت لها اسم المتسبب في الحادث وتفاصيل عن حياته ومكان اقامته، ونوع سيارته التي كان يقودها في ذلك الحين ، فقال الوالدان أن القرائن ظلت تتراكم يوماً بعد يوم على أن **جاكلين وجوانا** عادتا الى الحياة مرة أخرى .

ويحكي الأب عن واقعة أخرى، أنه أخرج من صندوق اللعب الخاصة بالمتوفيتين ألعاباً ظناً منه أن الفتاتين لا تعرفان عنها شيئاً، فوجد **جيليان** تنقض على الصندوق مخرجة لعبة غسالة الأطفال وممسكه وهي فرحة بها ، وقالت له : أنظر يا أبي ها هي غسالتى مرة ثانية .

ويواصل الأب حديثه كانت تلك اللعبة تخص الراحلة *جوانا* وتعتز بها كثيراً، وكان من المفترض أن الأب *جون بولوك*، آخر من يؤمن بفكرة التناسخ، حيث أنه كان كاثوليكيًا يتبع كنيسة روما، ومن المعروف أن أصحاب هذا المذهب لا يعترفون بعقيدة التناسخ، لكنه عاش على فكرة أن الله سوف يعوضه عن فاجعته بتوأمتين، واستسلم إلى الأمر وهو مقتنع بفكرة التناسخ.

أما الزوجة *فلورنس* لم تقبل فكرة التناسخ في بادئ الأمر، إلا أنها قالت في آخر الأمر (لقد وجدت نفسي أقنع بتلك المسألة جدياً)، فالتشابه الجسدي الذي يشبه حد التطابق، ثم تلك التصرفات الصادرة من فتاتها والأقوال التي تحكيانها، كل ذلك وأكثر يوحي بأن شيء ما خارق للطبيعة قد حدث، كل شيء أقنعني بمسألة التناسخ، فالتوأمتان تتعرفان فوراً على أشخاص، لن يحدث وأن زاروا البيت من قبل، ومع ذلك كانت التوأمتان تعرفان أسماءهما على الفور، فبماذا أفسر كل ذلك؟!

٣- الأغرب بقى بيقولك:

الطفل *لوك* 5 سنوات ادعى إنه قبل ما يتولد كان عبارة عن فتاة سوداء أسمها (*بامبلا*)، وإنه كان يرتدي قرط بأذنيه وله شعر أسود.

وعندما عرضوا على الطفل مجموعة صور لفتيات بشرتهم سمراء، أختار صورة لفتاة تسمى **بامبلا**، وبالفعل ماتت محروقة في أحد الفنادق!

إيه يا جماعة هو التخاطر، والتحريك عن البعد والتناسخ وحتى القتلة المتسلسلين أجنب بس؟!

٤- لأ ما بيقولك بقى:

في طفل سوري عنده 3 سنوات بس قال لأهله إنه كان شاب، وكان اسمه "**إيلاي لاش**" *Eli Lasch*

وإنه أدفن في المكان الفلاني، وبالفعل كان في شاب أختفى من ٤ سنوات ولما حفروا لقوا هيكل عظمي في المكان ده، كمان الطفل قال إنه أنضرب بفأس على جبهته وشاور على وحمة هو مولود بيها، وبالفعل لقوا الفأس مع الجثة، ومش بس كده لأ، ده عرفهم بيت القاتل كمان، وكل أهل القرية يشهدوا على الواقعة دي!

.....

المهم مين بقى اللي بيقولك ياريس؟!

معظم القصص اللي بيحكىها هو الدكتور

إيان بريتمان ستيفنسون طبيب نفساني أمريكي الجنسية، ومولود في كندا. عمل في كلية الطب بجامعة فرجينيا لمدة خمسين عامًا ، كرئيس لقسم الطب النفسي من 1957 إلى 1967 ، وأستاذ للطب النفسي من 1967 إلى 2001 ، وأستاذ باحث في الطب النفسي من 2002 حتى وفاته.

وله كتب عن التناسخ وعلم الأحياء، والدكتور **ستيفنسون** سافر أكثر من دولة، وبحث في حوالي 2500 حالة إدعاء تناسخ الأرواح لمحاولة معرفة الحقيقة.

البوست القادم إن شاء الله هنتكلم عن دراسات دكتور إيان، خاصة إنه يعتبر هو (البب أو البرنس) بتاع العلماء اللي بحثوا في موضوع التناسخ..

بس عاوزكم تفتكروا القصص اللي كتبتها دي عشان لسه عاوز أتكلم عليها، ما أنا لازم أحط التاتش بتاعتي ولا يرضيكم أعمل كوبي وبست وخلاص 😊😊

#البوست الثالث

دكتور/ستيفنسون البرنس الكبير

طبعاً البوست اللي فات كان غريب شوية -بالنسبة للناس اللي أول مرة تسمع عن الموضوع ده- وبدأنا نقول إيه يا جماعة هو في إيه بالظبط، خصوصاً إن معظم الحالات معروفة ومسجلة.

لكن في الحقيقة أكثر واحد أتكلم في الموضوع وجمع القصص اللي هنقول عليها حقيقة (حتى الآن) هو البروفيسور **ستيفنسون** واللي أتعرفنا عليه البوست اللي فات، والبوست ده إن شاء الله هنكمل كلامنا مع البرنس ده ونشوف دنيته إيه.

أفضلوا معاً  

زي ما قلنا البوست اللي فات:

إيان بريتمان ستيفنسون طبيب نفساني أمريكي الجنسية، ومولود في كندا. عمل في كلية الطب بجامعة فرجينيا لمدة خمسين عاماً ، كرئيس لقسم الطب النفسي من 1957 إلى 1967 ، وأستاذ الطب النفسي من 1967 إلى 2001 ، وأستاذ باحث في الطب النفسي من 2002 حتى وفاته.

وله كتب عن التناسخ وعلم الأحياء، والدكتور ستيفنسون سافر أكثر من دولة، وبحث في حوالي 2500 حالة إدعاء تناسخ الأرواح لمحاولة معرفة الحقيقة.

وبصفته مؤسس ومدير قسم الدراسات الإدراكية بالجامعة ، الذي يبحث في الخوارق ، أصبح ستيفنسون معروفًا دوليًا لبحثه في التناسخ ، وفكرة أن المشاعر والذكريات والسمات الجسدية وحتى الأمراض يمكن نقلها من حياة إلى أخرى.

وده أستدل بيه أنصار فكرة تناسخ الأرواح بأن رجل عالم وكبير زي ده، أكيد كلامه قيم ومهم ومش معقول يكون إشتغالة.

(لكن الحق لا يعرف بالرجال).

بداية الأمر ستيفنسون كان يعتقد إن الصفات والأمراض مش بتنتقل عن طريق الجينات و البيئة المحيطة بس، أبسولوتلي ، ده في بعض أشكال نقل الشخصية أو الذاكرة ممكن توفر نوعً ثالث من التفسير. ومع ذلك ، فقد أقر بعدم وجود دليل على وجود عملية جسدية يمكن بواسطتها للشخصية أن تنجو من الموت وتنتقل إلى جسد آخر ، وكان حريصًا على عدم الالتزام الكامل بالموقف الذي يحدث فيه التناسخ!

ليه؟!!

الصراحة مش عارف، يعني هو شايف إن ممكن الصفات تنتقل عن طريق إن الواحد قبل ما يموت هوب يلبس جسم حد تاني بس مش معترف كليا ساعتها بتناسخ الأرواح! اللي هو إزاي حضرتك؟!!

المهم نختصر الكلام ونقول إنه لسبب ما تم دعوة ستيفن لرحلة للهند (والعزومة دي كانت من الروحانية المتوسطة **إيلين غاريت** ، رئيسة مؤسسة مكافحة التخاطر ، التي مولت رحلته الأولى إلى الهند) عشان يقابل طفل مدعي إنه عاش حياة أخرى، يقوم إيه بقي، سبحان الله يا أخي، عشان عمك ستيفن نيته صافية بس، وفي خلال شهر واحد بس يقابل 25 طفل عندهم حالة تناسخ روح، ويعمل كتابه الأول:

(عشرون حالة توحى بالتناسخ) عام 1966.

بس خليكم فاكرين ده كويس 🐱

الغريب بقى إن بعد كده (**تشستر كارلسون**) مخترع التصوير بالأشعة قدم مليون دولار كتبرع لجامعة فرجينيا ، مقابل إن ستيفن يكمل أبحاثه، وده خلى أستيفن يتتحي كرئيس لقسم الطب النفسي، ويعمل قسم منفصل لوحده أتسمى بعد كده باسم (**قسم الدراسات الإدراكية**) ما الزهر لعب وركب أول موجة في سكة

الجنان أقصد الأموال 😄

عشان مانطولش هندخل في الوسائل اللي اتبعها ستيفن في التحري عن صحة تناسخ الأرواح.

النجم **ستيفنسون** بقى يجمع الأطفال اللي بيدعوا كده،
يسألهم أسئلة ويشوف ردهم طبيعي ولا بيترددوا،
وبعدين يجيب الشهود ويسأل عنهم يا ترى معروفين
بحسن السير والسلوك ولا النصب والإحتيال؟

وبعد كده يشوف عيلة الطفل ده لهم أي علاقة بالعيلة
اللي الطفل بيدعي إنه كان واحد منهم قبل ما يتولد ولا
لأ..

لقى كله سليم، خلاص قشطة مبروك يا بني أنت كنت
عايش قبل كده، لقي في حاجة مش مضبوطة لأ أخلع
أنت من هنا يا بايظ .

ستيفن بقى أكتشف حاجة كمان مهمة:

في بعض الحالات ، قد يكون للطفل في "الحياة
الماضية" علامات أو عيوب خلقية تتوافق بطريقة ما
مع السمات الجسدية للشخص السابق.

بمعنى، إن في أطفال مالهمش أصابع، أو أصابع
مشوّهة، والناس اللي هم بيدعوا أنهم عاشوا حياتهم
كانوا كده، طفل عنده علامة كأن في حاجة دخلت
وطلعت من جسمه، ويطلع إنه في حياته السابقة كان
مقتول رميا بالرصاص وهكذا!

وده لينك ستيفنسون بيشرح بنفسه إزاي بحث وحقق
علشان يعرف حقيقة تناسخ الأرواح

(<https://youtu.be/PbWMEWubrk0>)

(الفيديو على اليوتيوب بعنوان :

*Scientific Evidence for Reincarnation by
(Dr Ian Stevenson*

ومن القصص اللي حكاها ستيفن إن في رضية كانت
بتصرخ لما تقرب من أتوبيس أو حمام سباحة، وقال
إنها لما كبرت شوية وبقت بتتكلم قالت إنها فاكدة حياة
فتاة عمرها 8 أو 9 سنوات أتوبيس ضربها وقعها في
حقل أرز مغمور بالمياه فغرق، وتوصلت التحقيقات
إلى عائلة فتاة ميتة تعيش على بعد 4 أو 5 كم وقال
ستيفنسون إنه يعتقد (واخدين بالكم من كلمة يعتقد دي)
إنه ما فيش إتصال بين العائلتين.

طب قول لنا يا ترعة المفهومية، وبحر العلم ليه كلهم
أطفال؟!، ولية ما حدش كبير بيفتكر حياته السابقة؟!!

خلينا نكمل البوست الجاي إن شاء الله تعالى، علشان
شكلي طولت ومش عاوزكم تزهقوا مني ☺

#البوست_الرابع

رد العلماء على ستيفنسون

تكلّمنا في البوست اللي فات عن جزء بسيط من مجهودات دكتور إيان، في البحث عن تناسخ الأرواح، وقبل ما نتكلم على رد العلماء عليه هنقول حاجتين مهمين جدا توصل لهم دكتور ستيفنسون:

١- **الناس اللي ماتت موتة بشعة**: زي قتل أو حرق أو حادثة، هم أكثر ناس عندهم قابلية أن يرجعوا في أجساد أخرى.

٢- **الطفل بيفضل فاكر حياته الثانية** لحد سن صغير مش أكثر من ست سنين، وبعد كده الطفل بيمحي الذكريات تماما عشان يعرف يعيش حياته الجديدة في سلام!

هنركن كل اللي قولناه على جنب، ونشوف بقى زمايل ستيفنسون قالوا إيه؟

العلماء اللي أنكروا على ستيفنسون بيتكلموا أن الحالات اللي سردها ستيفنسون لها تفسيرات عادية غير الخوارق، وأنا شخصيا البوست القادم هأحاول أفند بعض القصص لما نتكلم عن الرد المنطقي ضد التناسخ.

١-الكاتب العلمي (نيريس هاينز) قال إيه؟ :

تكمن المشكلة الرئيسية في عمل ستيفنسون في أن الأساليب التي استخدمها للتحقيق في حالات التناسخ المزعومة ليست كافية لاستبعاد سرد القصص الخيالي البسيط من جانب الأطفال الذين يدعون أنهم تجسيد للأفراد المتوفين.

في الحالات الأكثر إثارة للإعجاب التي أبلغ عنها ستيفنسون (1975 ، 1977) ، فإن الأطفال الذين يدعون أنهم متجانسون يعرفون أصدقاء وأقارب الشخص الميت. معرفة الأطفال بالحقائق حول هؤلاء الأفراد ، إذن ، هي إلى حد ما أقل من دليل قاطع على التناسخ.

بمعنى إن أساليب بحث ستيفن خلال فترة من 1975:1977 كانت تعتمد على قصص أكفال لهم معرفة بأقارب الميتين اللي بيقولوا إن روحهم بتسكنهم وده يضعف الدليل على تناسخ أرواحهم اللي هو عبارة عن حكايات بس!

٢-الفلاسفة CTK Chari، وبول إدواردز :

أثاروا عددًا من القضايا ، بما في ذلك الادعاءات بأن الأطفال أو أولياء الأمور الذين قابلهم ستيفنسون قد خدعوه ، وأنه طرح عليهم أسئلة رئيسية ،سهل أي حد يعرفها.

كمان ستيفنسون كان يعمل في كثير من الأحيان من خلال المترجمين الذين آمنوا بما يقوله الأشخاص الذين أجريت معهم المقابلات (أظن واضحة يعني 😊)

٣-في نقطة كمان إن كثير من الأطفال اللي حكوإ إما كانوا فقراء وبيدعوا أن أرواحهم كانت متناسخة من أرواح ناس أغنياء (يعني جايبين يطالبوا بالميراث 😂😂)

أو أطفال بوذيين وهندوس اللي بيرضعوا عقيدة التناسخ أصلا مع ولادتهم.

٤- **ستيفنسون** نفسه قال إن تجاربه كانت بتحاول تفسر تناسخ الأرواح والعيوب الخلقية وغيرها، لكن هو ما يقدرش يجزم بأن التناسخ صحيح مية في المية!!

(مش فاهم إزاي برضه 😊)

المهم العلماء إنقسموا بين مؤيد، معارض، ونوع ثالث بيقول إن إيان كان جد في أبحاثه بس كان ساذج جدا..

كفاية كده عليكم عشان إن شاء الله البوست الجاي هنحفل على عمكم ستيفنسون ، وهزيط مع الزينة.

مين عاوز يحفل معايا؟! 😊😊😊

#البوست_الخامس

الرد العقلي على أدلة التناسخ

النهادة إن شاء الله هادلي بدلوي وأحفل على دكتور
ستيفنستون، ما أنا بقى طالما الكتاب بتاعي أزيط
براحتي بقى مش من نفسي ولا إيه؟!!!

إن شاء الله هاتكلم على جزئيتين:

جزئية تفسيرات د/إيان، وجزئية نقض بعض القصص..

أولاً: تفسيرات دكتور إيان:

طبعاً موضوع إخضاع تناسخ الأرواح لوسائل البحث
العلمي من تجربة وملاحظة واستنتاج ومراجعة النتائج
والحاجات اللي إتقالت في كتاب (الطفرات العلمية
الزائفة) فأنا في رأيي ما ينفعش أطبق الكلام ده على
حاجة أنا أصلاً معرفش ماهيتها ألا وهي (الروح)،
ودي حاجة تدعم شوية طريقة بحث د/ إيان، لكن
برضه تمنع أي حد يتكلم ويقول إن موضوع التناسخ
موضوع علمي، أو نظرية علمية أو حقيقة علمية لأنها
بتفتقد لأي أساس علمي معتمد.

١- **دكتور (ستيفنسون)** يقول إن من أدلة التناسخ وجود صفات مشتركة في الشكل والصفات الموجودة في الجينات بين أفراد الأسرة الواحدة.

وكم ان أستدل بوجود بعض العلامات زي الوحمة والعيوب الخلقية في أجساد الأطفال مدعي التناسخ بتشبه العلامات في أجساد الناس اللي ماتوا قبلهم زي ما شرحنا في البوست السابق (أحد الأطفال كان عنده علامة أو ندبة في الحلق، وادعى إنه كان شاب مات منتحر لما ضرب نفسه بالرصاص!) (

النقطتين دول أنا عندي إستفسار صغير فيهم:

هو إحنا مش بنتكلم عن تناسخ الأرواح؟! يعني الروح بتلبس جسم أي حد تاني، صح؟

طب إيه علاقة الروح بالصفات والجينات وشكل الجسد؟! حد فيكم درس أو قرأ إن الروح لها تدخل في صفات الإنسان؟!!

بلاش، واحد مات مقتول مثلا برصاصة في رأسه، الرصاصة هتعلم في الروح ولما تقمص جسد حد تطلع ندبة مكان الرصاصة؟!!

الجينات نفسها والعوامل الوراثية دي بتكون موجود في الجسد ولا الروح، على كده ليه ما حدش فكر ياخذ العامل الوراثي لأي حد بيدعي التناسخ، ويقارنه

بالناس اللي بيدعي إنه عاش حياتهم مع العلم إن ستيفنسون مات 2007م يعني مش من زمان أوي بمعنى حضر جزء كبير من التقدم التكنولوجي!

٢- أنا عندي حوالي ألفين صديق أو أكثر على الفيس
ليه مافيش حد منهم بيدعي التناسخ؟!!

لكن للأمانة د/إيان رد بإن الأطفال لغاية ست سنوات
بس ممكن يتذكروا، وبعد كده الذكريات تتلاشى

طب بلاش، ليه مجموعة أطفال بس اللي بيتذكروا ليه
مش كل الأطفال؟ لو حد عنده رد ياليت يقولي في
جزاه الله خيرا 😊

٣- في حسبة كده في دماغي لو كل واحد مات روحه
لبست واحد، في بلاد المواليد أعلى من الوفيات طب
دول بيجيلهم أرواح جديدة ولا بيأخدوا من بلاد تانية؟!،
وهنا أفكر جملة دكتور مصطفى محمود رحمه الله
تعالى إن جاز لي أقولها، وأستغفر الله إن كان فيها
تعدي أو إثم.

قال رحمه الله تعالى فيما معناه (ربنا معندوهوش أزمة أرواح عشان يلبس روح حد لجسد حد تاني) حاشا لله تعالى.

٤- **ليه أول ما بدأ البحث بدأ في الهند** اللي عندهم عقيدة تناسخ، وكمان رايح لطفل لقاهم 25 واحد وفيه شهود على كلامهم، وليه ما أفترضش إن ده عملية نصب وشهرة. وخاصة إن كلهم تقريبا بيحكوا حياة أشخاص ماتوا مقتولين أو في حوادث يعني أكيد أخبارهم كانت في الصحف، أقرب مثال الطفلة اللي قالت إنها كانت فتاة وضربتها حافلة وسقطت في حقل مغمور بالماء وماتت، الفتاة دي كانت بتبعد عن بيت الطفلة بحوالي 4 أو 5 كيلو ود/ إيان قال أعتقد إن العائلتين ماشفوش بعض!!، هو الموضوع فيه إعتقاد يا دكتور؟!

(موضوع الشهود اللي في الهند دول فكرني بمشهد من شركة المرعين المحدودة لما الطفلة إكتشفوها في المطعم، كائن من سكان المدينة قال إن الطفلة رفعتة في الهوا ورمته بقوة البني آدمين السحرية، فجاء واحد كده عبارة عن عيون كثير أوي بيقول إنه شاهد عيان (😊😊😊)

٥- **بلاش بقى حفل كده الرجل ميت** ومش عاوز أزيط أوي أو أفقد المهنية في النقل بس هأقولكم آخر حاجة بقى..

خدوا الثقيلة دي...

دكتور ستيفنسون قبل ما يموت وضع أوراق مهمة وحاجات في خزنة وليها كلمة سر معينة هو بس اللي يعرفها، وقال لزوجته وزميله إنه هيرجع لهم بعد الوفاة وهيقولهم الكلمة اللي يفتحوا بها الخزنة وده دليل قوي على التناسخ.

د/إيان تُوفي عام 2007، وزوجته أعلنت عن موضوع الخزنة أظن عام 2014م تقريبا، وخلال السبع سنوات دول دكتور ستيفنسون مار جعش، وأدينا دخلنا في 2019، و....الباقى إنتم عارفينه 😊😊

شكلي زودتها خالص، وفقدت للمهنية..بس طالما خربانة خربانة ندخل على الجزء الثاني.

الجزء الثانى: نقض بعد القصص المشهورة عن التناسخ:

القصص دي أنا ذكرتها في البوست الثاني باختصار، وإن شاء الله هأقول رأيي فيها باختصار برضه..

١- **باربورا كارلون:** البنت لما أدعت إنها الفتاة آن فرانك اليهودية ووصفت بيت الفتاة قبل ما يتعمل متحف، القصة وضحت نقطتين: إن أبو (آن) كان نزل

مذكرات الفتاة ككتاب في السوق، وإن أبله باربورا كانت بتحكي لهم عن أن في المدرسة، فالمذكرات ودروس المعلمة كانت قبل الإدعاء ولا بعده؟!!

٢- **قصة الشقيقتان التوأم:** أب وأم فقدوا بنتين، الأم لما حبلت الطبيب قال لها إنك حامل في ولد، لكن الأب كان عنده يقين إنها هاتجيب بنتين وفعلا ربنا كرمهما..

إيه الضمان إن الأب والأم مش وضعوا التوأم تحت ضغط نفسي، وذكريات علشان يعملوا نسخة نفسية وذهنية من أطفالهم اللي ماتوا، وده كمان رد على ستيفنسون لأن البنيتين ماكنش فيهم شبه أو تشوهات خلقية نتيجة حادثة إختيهما!

٣- **الطفل اللي ادعى إنه فتاة** وعرضوا عليه صور ستات سوداء مين اللي إختار الصور وعلى أساس إيه؟! وبرضه مافيش تشوهات ولا جينات خاصة إنه ذكر ادعى إنه كان أنثى، وكمان أعتقد إن كل الأطفال دول فاكرين الذكريات دي كويس حتى لما كبروا.

٤- **الطفل السوري** أعتقد إن مش ستيفان اللي قالها، بس موجودة على النت وعلى اليوتيوب والغريب إننا ما نعرفش اسم الطفل، ولا أهله، ولا القرية بتاعته، واللي بيحكي القصة بيقولك أهل القرية شاهدين وممكن تسألهم! **اللي هو مين ابن مين حضرتك؟!!**

كمان الطفل قال إن اسمه كان (إيلاي لاش) لو حد
سوري هنا ياليت يقولنا الاسم ده منتشر عندكم في
سوريا ولا إيه الحكاية؟!

أظن كفاية كده حفل، بس ده رأي شخصي مني
حضرتكم تقتنعوا بيه أو لا.. فده حرية شخصية.

البوست الجاي إن شاء الله هنقول التناسخ في الأديان ويا
ترى فعلا في أدلة على التناسخ في الإسلام ولا إيه..

#البوست السادس

الرأي الشرعي في التناسخ

المفروض هنتكلم عن التناسخ في الأديان، لكن في حاجة مهمة ماكنتش عارف أكتبها في أي بوست خاصة إني حاسس إني زودتها قوي البوست اللي فات بس عاوز أقول كام نقطة سريعة...

١- (هيلين بلافاتسكي) مؤسسة الثيوصوفية، واللي من أوائل اللي اتكلموا عن التناسخ ديانتها (بوذية!)

٢- أنا كنت مستغرب إزاي عالم زي (كارلسون) يتبرع بمليون دولار لستيفنسون عشان أبحاثه لغاية ما لقيت المعلومة دي:

(أدركت زوجة كارلسون دوريس اهتمامه بالهندوسية ، وخاصة النصوص القديمة المعروفة باسم فيداندا ، وكذلك في زن البوذية. استضافوا الاجتماعات البوذية ، مع التأمل ، في منزلهم. بعد قراءة كتاب فيليب كابلو

"الركائز الثلاث لزين" ، دعا دوريس كابلو للانضمام إلى مجموعة التأمل الخاصة بهم ؛ في يونيو 1966)

(يصف الباحث إيان ستيفنسون في مقاله "نصف حياة مع الخوارق" ، أسلوب كارلسون الخيري. وفقًا لستيفنسون ، فإن زوجة كارلسون ، دوريس ، كانت لديها بعض المهارة في الإدراك الخارجي ، وأقنعت كارلسون بالمساعدة في دعم أبحاث ستيفنسون. لم يقدم كارلسون تبرعات سنوية لجامعة فرجينيا لتمويل أعمال ستيفنسون فحسب ، بل قدم في عام 1964 تبرعًا كبيرًا بشكل خاص ساعد في تمويل واحد من أوائل الكراسي الموهوبة في الجامعة. كان ستيفنسون أول شاغل لهذا الكرسي.)

جمعية ودايرة، كارلسون يقدم تبرعات، يجي ستيفنسون يعلن إن زوجة كارلسون عندها بعض المهارة في الإدراك ا، يجي كارلسون يمول ستيفنسون ثاني والعجلة ماشية.

٣-تربية أيان ستيفنسون منذ الصغر كانت على الإهتمام بالخوارق الطبيعية والقراءة فيها و التي شجعه كانت أمه، ويمكن ده السبب إن يتخصص في الطب النفسي.

٤- رغم كل ده فالكل أجمع إن ستيفنسون كان رجل وقور ومحترم وكمان ستيفنسون قال إن تجاربه مش بتقول إن التناسخ موجود، إنما كملوا أبحاث وتجارب من بعدي عشان تأكدوا أنتم بأه أو لا!

طبعاً الخلفية الفكرية والعقائدية مهمة جداً نعرفها لما نبحث عن صحة موضوع جدالي زي ده، لإنها أكيد بتتحكم في ميول وأهواء الباحث-للأسف-.

نبطل اللت والعجن عشان شكلكم إتحنقوا مني



وندخل في البوست:

١-البوذية:-

طبعاً ديانة أرضية مخترعة، وما عندهومش جنة ولا نار، بس بيؤمنوا بالجزاء والعقاب. طب يعملوا إيه؟!

قالك نقول بتناسخ الأرواح، يعني لو مثلاً لو واحد كسر رجلك، وبعدين مات روحه تتقمص شخص تاني، والشخص التاني ده هيتكسر رجله برضه في حياته الجديدة، وده أسمه العدل الالهي، وكمان لو أنت كويس وصالح بس فقير، روحك ترجع في جسد واحد غني...

يا حلاااااوة 😄😄

٢- الهندوسية:

نفس الفكرة ما عندهومش إيمان باليوم الآخر، بس بيقسموا الناس طبقات فيقول لك التناسخ بقى بيعمل إيه:

(فالرجل الصالح بعد موته لو كان شودرياً فقيراً- ينتقل إلى العيش في جسد رجل من طائفة الحرفيين والصناع، ولو ظل رجلاً صالحاً في حياته الثانية ينتقل إلى جسد رجل من الملوك والأغنياء في حياته الثالثة، ولو ظل رجلاً صالحاً ينتقل إلى جسد براهمي أو كاهن في حياته الرابعة، حينها يكون لديه مصيران، لو صلح فيتحّد مع الإله براهما ويصل للنيرفانا (نيرفانا قرأتها فين قبل كده (ﷻ) اللي مثقف يقولي؟!) وبالتالي تنتهي دورة حياته، أما لو فسد فينتقل إلى الطائفة الأدنى في حياة التالية وتستمر الدورة.)

الناس دي كانت إصطباحيتها فل أوي 😂😂😂

٤-الإسلام:

بفضل الله سبحانه وتعالى وحده الذي أنعم علينا بنعمة الإسلام، واللي من أسس الدين والعقيدة الإيمان بالبعث، وباليوم الآخر والجنة والنار.

عشان كده عقيدة تناسخ الأرواح مش قوى خارقة نتعجب منها، إنما هي عقيدة فاسدة وباطلة بتضاد صريح القرآن والسنة، وأي واحد مؤمن بالله تعالى ومصدق بالقرآن واجب عليه أن يكذب عقيدة التناسخ من باب الكفر بالطاغوت.

وكمان إحنا عرفنا مين أول ناس إبتدعت الفكرة، ومين كان بيمول ستيفنسون.

وعشان الكلام يكون بأدلة هنذكر بعض الآيات والأحاديث من فتوى لدكتور **محمد صالح المنجد** حول تناسخ الأرواح ببعض الإختصار والتصرف البسيط:

))

الحمد لله والصلاة والسلام على رسول الله أما بعد :

المقصود تناسخ الأرواح هو أن الجسد إذا مات ، انتقلت الروح لتسكن جسداً آخر ، تسعد فيه أو تشقى

نتيجة ما قدمته من عمل ، وهكذا تنتقل من جسد إلى جسد ، والقول به من أبطل الباطل ، وأعظم الكفر بالله تعالى وبكتبه ورسله ، فإن الإيمان بالآخرة والحساب ، والجنة والنار مما علم بالضرورة مجيء الرسل به ، واشتمال الكتب المنزلة عليه . والقول بالتناسخ تكذيب لذلك كله.

والتفسير الإسلامي لأمر المعاد (يقصد يوم القيامة) واضح في كتاب الله وسنة رسوله صلى الله عليه وسلم ، ومن ذلك

قوله تعالى : (كل نفس ذائقة الموت ثم إلينا ترجعون)
العنكبوت/57 ،

وقوله : (إليه مرجعكم جميعا وعد الله حقا إنه يبدأ الخلق ثم يعيده ليجزى الذين آمنوا وعملوا الصالحات بالقسط والذين كفروا لهم شراب من حميم وعذاب أليم بما كانوا يكفرون)
يونس/4 ،

وقوله : (يوم نحشر المتقين إلى الرحمن وفدا ونسوق المجرمين إلى جهنم وردا) مريم/ 85 ، 86))

.....

((وفي السنة من ذكر المعاد وتقريره وتفصيل أمره ما لا يحصى كثرة ،

ومن ذلك قوله صلى الله عليه وسلم :

"إنكم محشورون حفاة عراة غرلا ثم قرأ : (كما بدأنا أول خلق نعيده وعدا علينا إنا كنا فاعلين) وأول من يكسى يوم القيامة إبراهيم" الحديث ، رواه البخاري (3100) ومسلم (5104) .

وقوله صلى الله عليه وسلم : " إن في الإنسان عظما لا تأكله الأرض أبدا فيه يركب يوم القيامة " قالوا أي عظم هو يا رسول الله ؟ قال : عجب الذنب " رواه مسلم (5255).

[والحديث ده رد على جزئية الوحمة والعيوب الخلقية التي ادعى إيان إنها بتنتقل بتناسخ الأرواح]

وقوله صلى الله عليه وسلم: "تُدنى الشمس يوم القيامة من الخلق حتى تكون منهم كمقدار ميل. قال سليم بن عامر [أحد رواة الحديث] : فوالله ما أدري ما يعني بالميل أمسافة الأرض أم الميل الذي تكتحل به العين. قال صلى الله عليه وسلم : فيكون الناس على قدر أعمالهم في العرق ، فمنهم من يكون إلى كعبيه ومنهم من يكون إلى ركبتيه، ومنهم من يكون إلى حقويه ومنهم من يلجمه العرق إجماعا. قال وأشار رسول الله صلى الله عليه وسلم بيده إلى فيه " رواه مسلم (5108).

وقوله عليه الصلاة والسلام: "أتي باب الجنة يوم القيامة فاستفتح فيقول الخازن من أنت؟ فأقول: محمد .

فيقول: بك أمرت لا أفتح لأحد قبلك " رواه مسلم (292). إلى غير ذلك من الأحاديث.

فالقول بتناسخ الأرواح ، تكذيب لهذه النصوص ورد لها ، وإنكار للبعث .

وما جاء في الشريعة من إثبات عذاب القبر ونعيمه وسؤال الملكين أدلة ظاهرة على أن روح الإنسان لا تنتقل إلى غيره ، بل يقع عليها وعلى الجسد العذاب والنعيم ، حتى يحشر الناس إلى ربهم .

يقول الإمام ابن حزم رحمه الله : (فيكفي من الرد عليهم إجماع جميع أهل الإسلام على تكفيرهم ، وعلى أن من قال بقولهم فإنه على غير الإسلام ، وأن النبي صلى الله عليه وسلم أتى بغير هذا) الفصل في الملل والأهواء والنحل 1/166

واعتقاد أن الجسد سيفنى ، دون أن يكون له عودة أخرى يذوق فيها النعيم أو يتجرع فيها العذاب ، سبيل إلى إغراق الإنسان في الشهوات والظلم والظلمات ، وهذا ما يريده الشيطان من أصحاب هذه العقيدة الفاسدة ، إضافة إلى غمسهم في الكفر بهذا المذهب الرديء. ((

والواجب عليك نصح هذا الإنسان ، وتذكيره بكلام الله تعالى وكلام رسوله صلى الله عليه وسلم ، ودعوته

للتوبة من هذا الكفر ، فإن تاب وأناب ، وإلا وجب
البعد عنه ، والتحذير من مجالسته ، وإعلان البراءة
من معتقده ، لنألا يغتر الناس به.

والله أعلم)) إنتهى كلامه حفظه الله.

#البوست السابع

مين المستفيد من الحكاية؟!!

أنا عارف إني طولت بس عشان نخلص من الموضوع
ده، هنقول من المستفيدين بعقيدة التناسخ:

١-**البوذيين والهندوس:** وعرفنا ليه. وكمان في جزئية
عندهم إن ممكن واحد يتزوج (بقرة) لإنه حاسس إن
روح زوجته تناسخت في جسد بقرته!

معلش يا جماعة.. الدم بيحن زي ما أنتم عارفين



٢-**الإلحاد:** وتقريبا الفكرة واحدة وهو لازم يكون في
عدل، وإن المظلوم يأخذ حقه طب هيحدث إزاي
والملحد ما عندهوش إيمان بوجود إله، أو جنة ونار؟!،
يجي التناسخ يحل لهم المشكلة دي، غير أنه بيروج
لفكرة إن الحياة جمعية ودائرة أتوماتيكي.

٣- ودول فئة منشقة عن الدين اسمها فرقة (الحلول والاتحاد) :

ودي نعوذ بالله تعالى بيتكلموا إن ربنا -حاشا لله تعالى، وعلا الله عز وجلّ عما يقولون علوا كبيرا- بيحل في أجساد بشر وحيوانات زي الخنزير، نعوذ بالله تعالى، وكمان ممكن يحدث إتحاد بين روح شيخهم والإله في نفس الجسد.

وعلى فكرة من أشهر اللي اتنسب ليهم العقيدة دي واحد اسمه (ابن عربي) وده سمعت إنه بيتعمل مسلسل حاليا بيصوره إنه من علماء الإسلام الكبار. 😲

ملحوظة جانبية: في شيخ كبير من زمان أظنه من أئمة الشافعية اسمه (ابن العربي) بالألف ولام التعريف وده رجل علم صالح.

٤-الكتاب والأدباء: ودول مش بيروجوا وعلى حاجة بس طبعا بيستفيدوا منها في روايات وقصص، وإن كنت أنا من الجزء اللي ما يحبش يكتب في حاجة تخالف معتقده وأخلاقه، لكن في الآخر بيتقال على

الأدب فن، والفن له معايير مختلفة، وبالتالي ماليش حق أهاجم كاتب عمل رواية قائمة على فكرة التناسخ.

لكن حابب أنشر رأي دكتور **مصطفى محمود** رحمه الله عن تجربته في كتابة روايات قائمة على فكرة التناسخ (**ري رواية العنكبوت**)، في فيديو حوالي 4 دقائق بعنوان:

(د.مصطفى محمود -رحمه الله- يُبطل بالأدلة عقيدة تناسخ الأرواح)

الرابط: <https://youtu.be/PTAySn7vBiU>

ياليت تسمعه.

معلش أزعجتكم وطولت عليكم فبعتذر بشدة، ويا رب يكون كلنا استفدنا ولو حد حابب نكتب في أي موضوع ثاني من الخوارق دي ياليت يقول..

جزاكم الله خيرا، ومتشكر جدا لمتابعتكم، وصبركم عليا..

وطلب أخير غلس، أي حد يكلمك عن تناسخ الأرواح
أرزع له الكتاب ده 🤪🤪

(على فكرة نيرفانا دي كانت في قصة أسطورة الكاهن الأخير، في سلسلة رفعت إسماعيل، لدكتور أحمد خالد توفيق رحمه الله تعالى. 😊)

يا رب الكتاب يكون عجبكم، واستفدت منكم،
وسعيد جدا بمتابعتكم، وإنكم أستحملتم دمي الثقيل
لغاية النهاية.

هذا وما كان من توفيق فمن الله عز وجل وحده، وما
كان من خطأ أو نسياني فمني ومن الشيطان.

#دتمم_سالمين

#تم_بحمد_الله_تعالى